



Tillaga til ályktunar

– Varalið í keppni meistaraflokks kvenna –

Tillaga að breytingu á grein 32 í reglugerð KSÍ um knattspyrnumót

Tillagan hljóðar svona:

Lagt er til að ársþing KSÍ 2019 samþykki breytingar á greinum 32 í reglugerð KSÍ um knattspyrnumót með eftirfarandi hætti:

Lagt er til að félögum verði heimilt að skrá til leiks varalið í meistaraflokki kvenna sem hefur þátttökurétt í deildakeppni Íslandsmóts. Hlutgengi með varaliði hafa allir leikmenn sem eru skráðir í félagið nema þeir 11 leikmenn sem hafa leikið flesta leiki með aðalliði á sama leiktímabili og þeir leikmenn sem byrjuðu síðasta leik aðalliðs á undan. Varalið getur ekki unnið sér sæti í efstu deild. Varalið getur fallið um deild.

Greinargerð

Sumarið 2016 léku þrjú venslalið í keppni 1. deildar kvenna og ljóst er að áhuginn á að veita ungum leikmönnum verðug verkefni er til staðar hjá fleiri félögum. Árið 2017 og 2018 voru tvö venslalið í 1. og 2.deild kvenna. Markmiðið með þessari lagabreytingu er að gefa fleiri ungum leikmönnum færi á að keppa við krefjandi aðstæður og undirbúa þá þannig betur undir feril í meistaraflokki. Leikmenn sem eru ungir að aldri þurfa ekki að yfirgefa uppeldisfélag sitt á meðan þeir eru enn á 2.flokks eða 3.flokks aldri og vonandi minnka líkur á brottfalli. Leikmenn sem eru ekki í leikmannahópi aðalliðs geta spilað leiki, sem þeir fá ekki með núverandi fyrirkomulagi. Fyrirkomulagið býr til fleiri möguleika til keppni fyrir leikmenn á 2. flokks aldri og varamenn í meistaraflokki en margar tillögur hafa verið lagðar fyrir ársþing KSÍ undanfarin ár til að bregðast við verkefnafæð á þeim vettvangi.

Kostirnir við tillöguna eru tvímælalaust þeir að krefjandi verkefni fyrir leikmenn gefa af sér fleiri og betri leikmenn. Ungir leikmenn geta verið lengur hjá uppeldisfélagi sínu og félagið getur hlúið áfram að þeim í stað þess að þurfa að fara annað eða hætta. Leikmenn á meistaraflokksaldri sem komast ekki í byrjunarlið fá tækifæri til að spila sem þeir hafa ekki í dag. Minnkar þörfina á félagsskiptum ungra leikmanna í venslafélög sem takmarka möguleika þeirra á að komast í aðalliðið eða í önnur félög á keppnistímabilinu. Fleiri lið sem keppa í meistaraflokki þýðir að fleiri leikmenn hafa möguleika á að spila í meistaraflokki heilt yfir.

Svipað fyrirkomulag er í mörgum Evrópulöndum, þar á meðal Danmörku, Þýskalandi og Spáni. Ef Ísland ætlar sér að eiga leikmenn og landslið sem standast þeim bestu snúning í framtíðinni er mikilvægt að hlúa vel að ungum leikmönnum og gefa þeim sem flest verkefni við hæfi. Félögin í landinu eiga að halda áfram að vera til staðar fyrir sína félagsmenn.

Breiðablik